



9. marts 2012

UPA2012/117

Inatsisartut suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqummiuppara.

Meeqqat kommunip ulluunerani paaqqinnittarfiutaaniinnerinut kommunillu aaqqis-sugaanik ulluunerani angerlarsimaffimmi paaqqinniffinniinnerinut akiliuteqartit-sisarneq pillugu apeqquteqaat aallaavigalugu oqallittoqarnissaanik siunnersuut.

(Inatsisartunut ilaasortaq Isak Hammond, Inuit Ataqatigiit)

Tungavilersuut:

Nunarsuarmi oqariartaatsit nuannarineqarnerfaat kikkunnillu tamanit uteqqattaarneqarnerpaaq tassaavoq "Meeqqavut siunissaraavut", isuma isumaqatigiuminartoq oqaatigissallugulu ajor-nanngilluinnartoq. Ajornarneruvorli siunissatta pitsaanagerusumik peroriartornissaannut atatil-lugu iliuusissat piviusunngortinnissat. Innuttaaqataasut nukarlarsaasut tallimat tikillugit ukiullit nunatsinni julip aallaqqaataani 2011-mi 4175-iupput, taamaalillutillu innuttaasut quler-arterutingajaat pillugit oqallittussaavugut.

Kommunit nammineersinnaanerannut atalluinnarpoq aningaasartuutiminnik nammineerlutit tullerriaarisinnaannissat, taamaalillunilu naalakkersuinikkut tullerriaarinerit aningaasaqas-sut-simullu nammassinnaasorisat tungavigalugit aalajangersaasoqartarluni.

Nunatsinni kommuni najugaqarfik apeqqutaatillugu meerarisap meeqqerivimmiinneranut aki-liutigisartagaq nikerartupilussuovoq. Qeqqata kommuniani isertitat apeqqutaatinnagit qaam-matini aqqanilinni qaammammut 1000 akiliutigisinneqartarput, illua'tungaani soorlu Kommu-neqarfik Sermersuumi isertitaqqortussuseq naapertorlugu akiliisitsisoqartarpoq, tasanilu iser-titaqarnerpaat Qeqqata kommuniani akiliutaasartumit qaammammut pingasoriaammik anginerusumik akiliisinneqartarlutik.

Inuiaqatigiit ineriartorneranni taamaattumillu angajoqqaat ineriartortitseqataaneranni pisa-ri-aqalersimavoq meerartatta toqqissisimanartumik peroriartornissaannut ilapittuutaasussamik kinguaarisalik meeqqerivimmiittuuteqartarneq.

Nunatsinni sumiikkaluaraanniluunniit Kommune-it aningaasatigut qanoq inissisimanerat, apeqqutaatikkuunaarneqartariaqarpoq meeqqerivimmut akiliuteqartarneq pillugu, taman-naa-vorlumi kinguaatta Nunamut tummaarisatsinnut sumi najugaqaralaruniluunniit, angajoqqaanit innuttaaqatiniillu assigiimmik pineqarnissaanut toqqammavissaq.